

札

樸

札樸第四目錄

覽古

雩

洪祀

輕脫

汁給

梁起雙闕

秭

料數

許所

卑

建瓴

均

病鉤

繕

纓

縛

抵

盈縮

綦

纓

長

娟

摧

撲

摘

枯槁

空閱

澆

廝

滔

沈

濫

望羊

槁暴

楚

大白小白

便程

乍

刁風

愒

苓泠零

意

衍

虛

隱書

孰何

識

疋

瓠

簌

癡

龍

鎔于

大谷

冰

晏

跼跼

準

炕

衡

場

瘠

暴

烝豚炙豚

駟

臚脹

旁唐

勞

黥髮

昆侖

觥

檣聯

顚

廔

噫

欬

嫫

袒

衣急

緣醕

臣瓚

劒

幰

靈舍藏

廟寢

琮

省毳

吳句

銑覲

木變石

蜜印

古瓦文

鎗

顏氏石杯

枰

筆柱

生草

腰扇

笙簧

帶鉤

笙席

案

隱囊

攏袴

契囊

昭文帶

小兒汲瓶

銅池

札樸第四目錄終

札樸第四

曲阜 桂馥 未谷撰

覽古

雩

王充論衡說論語風乎舞雩爲行雩祭鄭注論語同月
令大雩帝公羊傳大雩疏並引論語舞雩冠者童子案
大雩在四月卽周之六月龍見而雩是也其他爲旱修
雩多在秋冬無暮春雩祭之禮賈逵曰言大雩者別於
山川之雩豈山川之雩不關龍見邪

春秋桓五年秋大雩僖十一年秋八月大雩十三年

秋九月大雩成三年秋大雩七年冬大雩襄五年秋
大雩八年九月大雩十六年秋大雩十七年秋九月
大雩二十八年秋八月大雩昭三年秋八月大雩六
年九月大雩八年秋大雩十六年秋九月大雩二十
四年秋八月大雩二十五年秋七月上辛大雩季辛
又雩定元年秋九月大雩七年秋大雩九月大雩十
二年秋大雩

鄭注玉藻云春秋之義周之春夏無雨未能成災至
其秋秀實之時而無雨則雩馥案襄五年左傳秋大
雩旱也杜注雩夏祭所以祈甘雨若旱則又修其禮

故雖秋雩非書過也

論衡又謂浴乎沂當爲沿乎沂古人無入水浴體之事宋書禮志云周禮女巫掌歲時祓除蠶浴如今三月上巳如水上之類也蠶浴謂以香薰草藥沐浴也韓詩曰鄭國之俗三月上巳之溱洧兩水之上招魂續魄秉蘭草拂不祥月令暮春天子始乘舟蔡邕章句乘舟禊於名川也論語暮春浴乎沂洧上及下古有此禮今三月上巳祓於水濱蓋出此也馥案蔡以浴沂爲祓禊是知所書石經不作沿也

洪祀

晉書孔嚴傳隆和元年詔以天文失度欲依洪祀之制於太極殿前庭親執虔肅嚴諫曰洪祀雖出尚書大傳先儒所不究歷代莫之興承天接神豈可以疑殆行事乎又江道傳道諫曰臣尋史漢舊制藝文志劉向五行傳洪祀出於其中其文曰洪祀大祀也陽曰神陰曰靈舉國相率而行祀順四時之序無令過差今按文而言皆漫而無適不可得詳又曰按洪祀之文惟神靈大畧而無所祭之名稱舉國行祀而無貴賤之阻有赤黍之盛而無牲醴之奠儀法所用闕畧非一馥謂此二傳當錄附尚書大傳後

輕脫

三國志多言爲將輕脫案僖三十三年左傳秦師輕而無禮必敗輕則寡謀無禮則脫入險而脫又不能謀能無敗乎杜注脫易也

汁給

集韻歲在未曰汁給童子逢盛碑作協給爾雅釋天作協洽案五帝叶光紀史晨碑作汁光紀樂緯叶圖徵或作汁圖徵洽給亦以聲近相借

梁起雙闕

梁書丘仲孚傳初起雙闕以仲孚領大匠案何胤傳胤

謂王果曰吾昔於齊朝欲陳兩三條事一者欲正郊丘
二者欲更鑄九鼎三者欲樹雙闕世傳晉室欲立闕王
丞相指牛頭山云此天闕也是則未明立闕之意闕者
謂之象魏縣象法於其上浹日而收之象者法也魏者
當塗而高大貌也今梁德告始不宜遂因前謬卿宜詣
闕陳之沈約上建闕表云萬雉之外兩觀弗興空指南
峯縣法無所馥謂梁起雙闕當因諸臣表請而建議者
何盾爲之始

秭

徐岳數術記遺黃帝爲法數有十等及其用也乃有三

焉十等者億兆京垓秭壤溝澗正載三等者上中下也
其下數者十十變之若言十萬曰億十億曰兆十兆曰
京也中數者萬萬變之若言萬萬曰億萬億曰兆萬兆
曰京也上數者數窮則變若言萬萬曰億億億曰兆兆
兆曰京也風俗通千生萬萬生億億生兆兆生京京生
秭秭生垓垓生壤壤生溝溝生澗澗生正正生載馥案
此言京生秭秭生垓與徐氏京垓秭次第不同說文云
十萬曰億又云數億至萬曰秭此皆下數數億至萬曰
秭者猶言萬億曰秭也今以下數計之十萬曰億十億
曰兆兆百億也十兆曰京京千億也十京曰秭秭萬億

也故曰萬億曰秭與風俗通京生秭次第相符徐氏所列垓在秭前未知其審

料數

玉篇料數也說文數計也秦策以上客料之趙何時亾高注料數通鑑舉宋濫錢之弊云市井不復料數

許所

淮南道應訓今夫舉大木者前呼邪許後亦應之魏子才曰關西方言致力於一事爲所李獻吉曰西土人謂著力幹此事則呼爲所馥謂所許聲相近詩伐木許許說文引作所所云伐木聲也

埤

一切經音義埤增也厚也助也案說文溼字云埤增水
邊土人所止者此增義也詩北門政事一埤益我傳云
埤厚也此厚義也節南山天子是觚箋云觚輔也王肅
作埤廣雅埤助也此助義也

建瓴

漢書高帝紀譬猶居高屋之上建瓴水也案戴侗云瓴
牝瓦仰蓋者仰瓦受覆瓦之流所謂瓦溝

均

國語出均立度案樂叶圖徵云聖人承天以立均宋均

注均長八尺施弦以調六律也馥案京房作準以定律準以竹均以絲

病鉤

趙策武安君曰綴病鉤身大臂短不能及也馥謂病鉤猶病弩漢書音義如淳曰弩病兩足不能相過鉤弩皆取象爲名

繕

廣韻繕繕也釋詁繕善也案三蒼繕治也繕之言善也詩叔於田序繕甲治兵箋云繕之言善也周禮縫人注同

纓

玉篇纓帶也案離騷旣普余以蕙纓又爲馬腹帶國語懷挾纓纓

縛

釋典多羅樹葉書凡有二百四十縛案廣雅縛束也地官羽人十搏爲縛注云縛羽數束名也

抵

列子無底之谷名曰歸墟漢書項籍傳請斬獄掾曹咎書抵櫟陽獄史司馬欣應劭曰抵相歸抵也食貨志天下大氏無慮皆鑄金錢又云大氏皆遇告顏注氏讀曰

抵歸也大氏猶言大凡也

盈縮

國語盈縮轉化盈當爲縕通作羸國策縮於財用則匱注云縮羸之反也班固幽通賦故遭罹而羸縮

綦

綦有四義一曰履廣雅綦履是也二曰履飾漢書揚雄傳履機槍以爲綦顏注綦履下飾也晏子景公爲履黃金之綦西京雜記趙飛燕女弟遺七寶綦履後漢書劉盆子傳俠卿爲制直綦履章懷注綦履文也蓋直刺其文以爲飾是也三曰屨系士喪禮夏葛屨冬白屨皆總

緇紉純組綦繫於踵鄭注綦屨系也所以拘止屨是也
四曰履迹班婕妤賦俯視兮丹墀思君兮履迹晉灼曰
綦履迹也張景陽雜詩庭無貢公綦是也

纓

廣韻纓下引韋昭云繫也漢書揚雄傳虹蜺爲纓顏注
纓系也李善注文選纓旗上繫也方言所以縣帶宋魏
陳楚江淮之間謂之纓

長

說文媽長兒姪長好兒豔好而長也娉弱長兒論衡上
世之人侗長佼好史記蘇秦傳後有長佼美人爾雅委

委佗佗美也孫炎云佗佗長之美神女賦穠不短纖不長登徒子好色賦增之一分則太長減之一分則太短洛神賦穠纖得中修短合度馥謂穠短不如纖長楚王所以愛細腰也

娟

娟本作嫵廣韻嫵娥眉兒宋玉神女賦眉聯娟以蛾揚洛神賦修眉聯娟

推

漢書五行志推其眼以爲人晁注云推謂敲擊去其精也案史記刺客傳秦始皇惜高漸離善擊筑重赦之乃

瞿其目索隱云以馬矢熏令失明集韻瞿或作瞿

撲

字林手相搏曰撲通俗文爭倒曰撲晉中興書石勒與
李陽共相打撲是也又秦漢之刑曰囊撲說苑陛下車
裂假父囊撲兩弟東觀漢記鄧太后收杜根囊盛撲殺
之執法者私語行事人使不加力先賢行狀杜根伏誅
誅者皆絹囊盛於殿上撲地根以撲輕得蘇息又器曰
撲滿滿則撲地破之西京雜記國人贈公孫宏撲滿一
枚是也

摘

淮南本經訓摘蚌蜃高注摘猶開也開以求珠也馥案
摘當爲摘說文摘有拓義增韻拓廣開也揚雄甘泉賦
拓迹開統拓亦借字當爲拓字書拓張衣令大也太元
天地開闢宇宙拓袒

桔槔

莊子天運篇桔槔者引之則俯舍之則仰文穎說烽火
云橰上作桔槔以薪置其中有寇則然之其字皆從木
通俗文機汲謂之掣槔字皆從手

空閼

莊子空閼來風司馬云門戶孔空風善從之又云瞻彼

闕者虛室生白司馬云闕空也蓋指室之牖宋玉風賦
空穴來風

澆

王注楚辭回波爲澆胡注通鑑水洄洑曰澆吐谷渾有
澆河呂光開以爲郡此郡蓋置於澆河洄曲處今作洮

廝

史記河渠書乃廝二渠以引其河漢書溝洫志廝作醴
孟康云醴分也馥謂廝卽斯斯亦分也

滔

廣雅滔漫也詩天降滔德傳云滔漫也堯典浩浩滔天

傳云浩浩盛大若漫天

沈

漢書刑法志山川沈斥注云斥卽斥鹵沈卽川澤風俗通山澤篇沈者莽也言其平望莽莽無涯際也沈澤之無水斥鹵之類也述征記有鳥當沈續記云齊人謂湖爲沈

濫

申鑒水可使不濫不可使無流案何晏曰濫溢也孟子洪水橫流汜濫於天下漢書司馬相如傳汎淫汎濫

望羊

春秋元命苞武王柔肩望羊晏子春秋杜肩望羊待於朝大戴禮武王望羊哀十四年左傳長而上僂望視杜注目望羊字又作洋莊子秋水篇河伯始旋其面目眦洋向若而歎釋文云司馬崔云眦洋猶望羊仰視貌馥案正作陽論衡骨相篇武王望陽

周禮內饗豕盲眦而交睫腥杜子春云盲眦當爲望視賈疏云內則爲遙望之字

信案望陽言能望視太陽如丁謂者也

槁暴

荀子木揉以爲輪其曲中規雖有槁暴不復挺者馥案槁借字當爲𦵏考工記𦵏雖弊不𦵏鄭注𦵏暴

楚

六書故楚一名荆捶人卽痛因名楚痛

大白小白

禮明堂位殷之大白巾車革路建大白以卽戎注以大
白爲殷旂釋名白旂殷旌也帛繼旂者也詩六月白旂
央央傳云白旂繼旂者也馥謂白爲旂之正色詩之白
旂卽禮之大白建於戎車齊桓公名小白謂白旂之小
者杜注定四年左傳云令賤人施其旂執以從會卽小
白故可手執

便程

書平秩東作史記作便程詩秩秩大猷說文引作戴戴
又越讀若詩威儀秩秩程戴越竝從呈與秩聲相近

作

玉篇忤慙也顏色變也分兩義論語其言之不忤馬融
曰忤慙也此慙義也曲禮容毋忤鄭注忤顏色變也祭
義孝子臨尸而不忤鄭注色不和曰忤此色變義也

刁風

今謂善訟爲刁風南北通行此字循習不察案史記貨
殖傳而民雕悍少慮索隱云言如雕性之捷悍也馥謂
刁字省筆吏胥苟趨簡易用以代雕耳

惓

玉篇惓疲也聲類惓短氣兒也前燕錄慕容儁寢疾曰
吾患惓頓恐不濟通鑑北齊常山王演抱王晞曰吾氣
息惓然恐不復相見

苓泠零

文選七發蔓草芳苓李善注苓古蓮字天官內饗羊苓
毛而毳羶徐邈讀苓爲朗年反廣韻零落賢切先零西
羌也漢書趙充國傳先零豪言願時渡湟水北注零音
憐

意

玉篇意思也憶意不定往來念也禮記大學正義云總包萬慮謂之心爲情所意念謂之意禮運非意之也注云意心無所慮也正義云謂於無形之處用心思慮也無慮卽慮無也詩思皇多士箋云思願也正義云以意之所思必情之所願也

衍

書有溢字曰衍文衍當爲緹或省作羨孟子以羨補不足詩四方有羨傳云羨餘也穆天子傳南絕沙衍沙衍卽沙羨水經注江水東北至江夏沙羨縣漢書溝洫志河災之羨溢中國也尤甚顏讀羨與衍同史記貨殖傳

時有奇羨注云謂時有餘衍也司馬相如傳功羨於五帝司馬彪云羨溢也周禮大祝辨九祭二曰衍祭先鄭云衍祭羨之道中典瑞璧羨以起度先鄭云羨長也長讀直亮切論語長一身有半世說王恭曰恭作人無長物

漢志江夏郡沙羨晉灼曰羨音夷廣韻收羨字於六脂部

虛

上虛借爲虛實字因上有空義也孟康注漢書云西方謂亾女壻爲上壻上空也

隱書

漢書藝文志隱書十八篇注云劉向別錄云隱書者疑其言以相問對者以慮思之可以無不喻馥案釋言隱占也注云隱度少儀軍旅思險隱情以虞注云隱意也思也虞度也常思念己情之所能以度彼之將然否後漢書安帝紀隱視幽心注云隱審盡心

孰何

史記衛綰傳不譙呵綰漢書作孰何李奇曰孰誰也何呵也馥案孰當爲敦說文敦誰何也

識

漢石經論語賢者志其大者今論語作識案識古作志
周禮保章氏掌天星以志星辰日月之變動僖二十四
年左傳以志吾過鄭注竝云志古文識識記也

𠂔

說文允𠂔曲脛也易大有匪其𠂔虞翻云足𠂔體行不
正書洪範六曰弱傳云𠂔劣昭七年左傳孟縶之足不
良弱行注云跛也馥案此皆言足疾也一切經音義𠂔
與允同引通俗文短小曰𠂔崔鴻後趙錄王謨𠂔短無
威儀呂氏春秋明理篇盲禿偃𠂔注云𠂔短仰者也馥
案此皆言短疾也檀弓天久不雨吾欲暴𠂔而奚若注

云佺者面鄉天覬天哀而雨之僖二十一年左傳公欲
焚巫佺注云或以爲佺非巫也瘡病之人其面上向俗
謂天哀其病恐雨入其鼻故爲之旱呂氏春秋盡數篇
苦水之所多佺與偃人注云佺突胷仰面疾也馥案此
皆言仰疾也玉篇允僂也古文苑短人賦其餘佺公劣
厥僂窶馥案此皆言僂疾也荀子正論篇是猶偃巫跛
匡大自以爲有知也注云匡讀爲佺廢疾之人王霸篇
是故百姓賤之如佺注云字書無佺字蓋當爲佺病人
也抱朴子洪稟體佺羸臧榮緒晉書山濤子淳元佺疾
不仕馥案此皆未言其何疾也

報

史記建元以來王子侯年表有城陽頃王子報侯劉息
徐廣曰報一作報漢書五行志報山石轉立晉灼曰漢
注作報山馥案報當爲執取其聲也集韻報質入切音
執

窾

廣韻窾空也案子華子論醫云空窾之塞也莊子道大
窾漢書楊王孫傳窾木爲匱服虔曰窾音款窾空也通
作款釋器鼎款足者謂之兩謂足中空也莊子款啟窾
聞之夫注云款空也漢書司馬遷傳實不中其聲者謂

之款服虔曰款空也太史公自敘作𣦵𣦵字見於諸書
音義甚明玉篇失載

癡

語林王藍田少有癡稱王丞相辟之旣見云王掾不癡
何以云癡案戶令癡症侏儒腰折一肢廢如此之類皆
爲癡疾馥謂癡爲癡疾之一人謂藍田癡故有癡稱

轆

方言車轄齊謂之轆注云車軸頭也馥案史記田單傳
令其宗人盡斷其車軸末而傅鐵籠已而燕軍攻安平
城壞齊人走爭塗以轄折車敗爲燕所虜唯田單宗人

以鐵籠故得脫馥謂轡籠字異義同

鐔于

宋書言鐔于之制上有銅馬馥謂非馬蓋駁獸也駁似馬故作馬形凡鐘上皆飾猛獸容齋續筆言所見鐔于有虎鈕是也

大谷

閒居賦張公大谷之梨李善云大谷未詳案王廙洛都賦梨則大谷冬熟張公秋黃華延洛陽記城南五十里有大谷舊名通谷陳思王贈白馬王詩大谷何寥廓

冰

集韻冰逋孕切案李義山詩碧玉冰寒漿又琉璃冰酒
缸又簾冰將飄枕唐書韋思謙傳涕泗冰須皆讀去聲

晏

急就篇屏廁清園糞土壤顏注屏僻晏之名也馥謂晏
當爲偃莊子庚桑篇適其偃注云偃屏廁也屏廁則以
偃浚是也屏當爲屏

跼跼

或問後漢書馬援傳飛鳶跼跼墮水中跼跼作何義訓
畚曰依字當作跼漢書音義如淳曰跼近邊欲墮之意
瓚曰跼危欲墜之意也

跖音鹽董衡唐書釋音誤作都念切

準

木工一目衰視謂之準淮南齊俗訓眇者使之準高注
目不正因令睵又汜論訓夫繩之爲度也可卷而伸也
引而伸之可直而睵西京雜記鄒陽几賦眇者督直聳
者磨礱班固荅賓戲離婁眇目於豪分太白陰經說水
平槽云三池浮木齊起眇目視之齒齊平則爲天下準
式

炕

漢書揚雄傳炕其氣顏注炕絕也馥案王莽傳皆炕龍

絕氣

黻

玉篇黻面垢也淮南修務訓舜黻黑劉向九歎顏黻黻以沮敗兮

煬

煬有二義郭注方言云今江東呼火熾猛爲煬文選賦颺檣燎之炎煬此一義也列子黃帝篇煬者避竈司馬云對火曰煬淮南云富人衣纂錦貧人煬竈口此又一義也

燔

淮南時則訓湛燬必潔高注燬烝炊也馥案燬借字當
爲饔特牲饋食禮主婦視饔爨於西堂下鄭注炊黍稷
曰饔

暴

方言烈暴也案蔡中郎聞燒桐火烈聲知爲良木火烈
卽暴也鹽鐵論苟爲無本若蒿火暴怒而無繼

烝豚炙豚

京師貴食烝豚炙豚鹽鐵論古者燔黍食稗而燂豚以
相饗廣雅燂謂之魚字書魚烝也詩閟宮傳云毛魚豚
也鄭注地官封人云毛魚豚者爛去其毛而魚之

駟

釋言駟傳也舍人曰尊者之傳也馥案襄二十一年左傳祈奚乘駟而見宣子昭五年傳楚子以駟至於羅汭晉語乘駟自下脫會秦伯於王城晏子春秋乘駟而自追晏子此皆尊者之傳

臚脹

急就篇寒氣泄注腹臚脹案易通卦驗人足陽明脈盛多病臚腫續漢書律歷志注小暑病臚腫

旁唐

廣韻芒碭山名案漢書司馬相如傳珉玉旁唐顏注旁

唐文石也唐字本作礪馥謂旁唐卽苾礪說文礪文石也

勞

廣雅勞屠也玉篇勞與剔同案詩狄彼東南箋云狄當作剔白虎通狄者易也淮南子兪見狄牙卽易牙說文逃古文作湯

黥髮

昭二十八年左傳有仍氏女黥黑而甚美光可以鑑杜注美髮爲黥正義云黥卽鬢也詩鬢髮如雲傳云黑髮也馥案或作縝廣雅縝黑也謝朓詩有情知望鄉誰能

續不變

崑侖

竹書穆王十七年西征崑侖上案禹貢雍州織皮崑崙析支渠搜西戎卽敘鄭注崑崙謂別有崑崙之山非河所出者也馬注崑侖在臨羌西漢志金城臨羌縣西有弱水崑侖山祠逸周書王會解正西有崑侖等九國是也

晉書張駿傳酒泉太守馬岌上言酒泉南山卽崑崙之體也周穆王見西王母樂而忘歸卽謂此山宜立西王母祠

木衣卷四
二
僦

通俗文雇載曰僦漢書鄭當時傳當時爲大司農任人
賓客僦謂受雇賃而載運也

檣聯

楚詞九歌擗蕙檣兮旣張說文檣屋檣聯也文選西京
賦鏤檻文槐李善引聲類槐屋連綿也覆謂連綿卽檣
聯廣韻棉屋聯棉是也淮南本經訓縣聯房植高注縣
聯聯受雀頭簪桷者釋名桷或謂之椳椳綿也綿連椳
頭使齊平也上入曰爵頭形似爵頭也通鑑陳起三閣
縣楣闌檻皆以沈檀爲之胡注縣楣橫木施於前後兩

楹之閒下不裝構今人謂之挂楣馥謂縣楣卽縣聯也

顆

顏氏家訓北土通呼物一出改爲一顆馥案漢書賈山傳使其後世會不得蓬顆蔽冢而託葬焉顏注顆謂土塊

屨

廣雅屨重也案玉篇屨屨也屨重屨也

噫

士虞禮聲三啓戸注云聲者噫歆也將啓戸警覺神也馥案噫卽欬也噫欬聲相近曲禮車上不廣欬疏云欬

聲欬也聲當爲謦列子黃帝篇宋康王謦欬莊子徐無鬼篇況乎昆弟親戚之謦欬其側

欬

王褒九懷糴土忽兮塵塵西京賦欬從背天薛綜注欬之言忽也馥案俗或作欬史記索隱引孔臧與孔安國書舊書潛於壁室欬而復出風俗通義臧仲英家人作食設案欬有不清塵土投汚之蜀志卻正傳故從橫者欬披其胃狙詐者暫吐其舌也後漢書何進傳大將軍不稱疾不臨喪不送葬今欬入省此意何爲夏侯湛獵兔賦或紛欬以驚驚異苑苻堅剖周虢棺臨視虢屍欬

回眸又云句吳平川門前生青桐平惡而斫殺後死桐
歟自還立於故根上魏書獻明賀皇后夢日出室內寤
而見光自牖屬天歟然有感賈岱宗大狗賦聞林獸之
羣爭歟斷鑠而斲石顏魯公多寶塔銘下歟崛以踴地
又須彌之客歟入芥子集異記明皇射一鶴將及地歟
然矯翰西南而逝

蠅

太元蠅其膏案蠅當爲𧈧玉篇以𧈧爲古孕字淮南精
神訓一月而膏文子九守篇精氣爲人人受天地變化
而生一月而膏

袒

玉篇褐馬背袒衣也馥謂袒衣者馬背覆衣無袖如人之袒也孟子許子衣褐趙注褐以毳織之若今馬衣也高誘注淮南云褐毛布如今之馬衣定八年左傳主人赫衝或濡馬褐以救之杜注馬褐馬衣

袒褐當作但褐說文但褐也袒衣縫解也今以袒代但以綻代袒內則衣裳綻裂注云綻猶解也

衣急

廣韻褊衣急案詩維是褊心傳云褊急也說文急褊也

綠醕

吳都賦飛輕軒而酌綠醪當作淶鄴西京雜記鄒陽酒
賦其品類則沙洛淶鄴文選笮賦傾縹資以酌鄴李善
引吳錄地瑤志湘東鄴水以爲酒有名張載鄴酒賦匪
徒用法之窮理信泉壤之所鍾齊民要術有作鄴酒法
水經注耒水云鄴縣有鄴湖湖中有洲洲上民居彼人
資以給釀酒甚醇美謂之鄴酒歲常貢之荊州記長沙
郡鄴縣有鄴湖周回三里取湖水爲酒酒極甘美又云
淶水出豫章康樂縣其間烏程鄉有酒官取水爲酒酒
極甘美與湘東鄴湖酒年常獻之世稱鄴淶郭仲產湘
州記衡陽縣東南有鄴湖土人取此水以釀酒其味醇

美所謂鄴酒晉平吳始薦鄴酒於太廟是也宋書庾炳
之傳在尙書中令奴酤鄴酒利其百十夏仲御別傳爰
有天水玄酎長安清醇雜以東鄴碧素苾芬北史長孫
嵩傳劉裕遺以鄴酒通鑑陸納破丁道貴於淶口注云
衡陽縣東二十里有鄴湖其水湛然綠色取以釀酒甘
美謂之鄴淶淶口卽鄴湖口也

臣瓚

漢書注有臣瓚水經注稱薛瓚案後秦記姚襄遣參軍
薛瓚使桓溫卽其人也

信案陳霆兩山墨談日案晉中興書監和嶠嘗領命

校正穆天子傳五卷瓚乃其校書官屬郎中傅瓚也
後人取其說以釋漢書故有臣瓚注語此於臣字雖
著實而穆天子傳文無與漢書可通薛瓚之說爲優

劍

劍者人所帶兵也其末謂之鉞又謂之鏃其刃謂之臘
亦謂之剗中央隆起謂之脊通謂之身亦謂之莖所以
受莖謂之夾所以飾夾謂之緌以韋謂之鞞鞞其鼻謂
之鐔亦謂之珥鼻玉謂之琕首飾謂之鑄其柎謂之削
亦謂之鞞亦謂之櫜亦謂之室又謂之廓所以韜櫜謂
之衣衣謂之袂又謂之袂襖其帶謂之繁

鐔有兩義廣韻屬侵部者訓劒鼻屬覃部者訓劒口
說文鐔劒鼻也廣雅劒珥謂之鐔釋名劒其旁鼻曰
鐔鐔尋也帶所貫尋也王逸注楚辭玉珥謂劒鐔也
司馬彪注莊子鐔劒珥也鮑注國策鐔珥鼻也此皆
主劒鼻言之三蒼鐔劒口也集韻劒口謂之鐔顏注
急就篇鐔劒刃之本入把者也又注漢書韓延壽傳
鐔劒喉也鄭司農注考工記莖謂劒夾人所握鐔以
上也此皆主劒口言之

幃

小爾雅幃褕謂之童容案幃亦作幃淮南子渠幃以守

高注渠甲名幃幃所以禦矢

靈舍藏

拾遺錄太上皇以寶劔賜高祖藏於瑤庫有白氣從戶中出如龍蛇呂氏更瑤庫名曰靈舍藏惠帝卽位以此貯禁兵名靈舍府馥案三輔黃圖武庫蕭何造以藏兵器呂后改庫曰靈金藏然則靈舍者靈金之誤

廟寢

釋宮室有東西廂曰廟無東西廂有室曰寢戴侗曰宮前曰廟後曰寢今王宮之前殿士大夫之聽事是也虞箴曰民有寢廟巧言之詩曰奕奕寢廟傳曰夫鼠不穴

寢廟畏人故也猶後世言廟朝廟堂也死則異爲宮而祭之有廟而無寢謂之祖廟禰廟通謂之宗廟

琮

三禮圖所畫琮八出陳祥道禮書云體方而四角漢碑所圖則五角或十角

宥器

家語魯桓公之廟有宥坐之器虛則欬中則正滿則覆明君以爲至誠故常置之於坐側馥案文子守弱篇三皇五帝有勸戒之器命曰侑卮周禮春官膳夫以樂侑食大司樂王大食三宥皆令奏鐘鼓是侑與宥通侑卮

卽有坐之器

吳句

刀有號吳句者案鰠鮓魚名禹四海異物大都魚刀鄭注魚刀魚兵如刀者也

銑鏡

陳書蕭摩訶傳遙擲銑鏡正中其額案集韻銑鏡小鑿也說文銑小鑿

木變石

青州都統慶公見惠黑龍江木變石刀子爲言古木沈水年久化爲石故俗呼木變石舉示坐客無能稱其物

也案周書王會夷用闢木孔晁注夷東北夷也木生水
中黑色而光其堅若鐵馥謂木變石卽闢木但孔謂生
水中與都統目驗者異集韻闢木名此據王會爲說閻
百詩尙書古文疏證云寧古塔與肅慎相近水中木變
爲石卽石砮也榆變者上松變者次之說與都統合

蘇長公集有順濟王廟新獲石砮記云得古箭鏃槩
鋒而劒脊其廉可剡而其質則石也異哉此孔子所
謂楛矢石砮肅慎氏之物也何爲而至此哉

晉書肅慎氏傳其國東北有山出石其利入鐵將取
之必先祈神周武王時獻其楛矢石砮馥案此言石

弩出於山中又異矣唐書盤盤國在南海石爲矢鏃
今緬江亦有木變石與黑龍江所出同

魏志景元三年肅慎貢弓長三尺五寸楛矢長一尺
八寸所稱魏尺邪周尺邪晉時肅慎每貢其矢亦言
一尺八寸若仍是周尺苟最何不據以定樂豈肅慎
之尺亦隨時變與魏晉等邪

蜜印

古官印有歿後隨葬者吳志孫琳傳發孫峻棺取其印
綬是也有繳上者晉書陶侃傳遣左長史奉送太尉章
荊江州刺史印是也若追贈之爵則用蜜印示不復用

魏王基碑贈以東武侯蜜印綬晉書山濤傳策贈司徒
蜜印紫綬唐音癸籤贈官刻蠟爲印謂之蜜印西京雜
記南越王獻高帝蜜燭二百枚卽今之蠟燭

古瓦文

秦漢瓦頭文有蘭沱宮當宗正宮當案史記司馬相如
傳華榱璧璫司馬彪曰以璧爲瓦之當也西都賦裁金
璧以飾璫又李尤平樂觀銘棼梁照曜朱華飾當廣雅
棺當謂之脉又云脉棺頭然則瓦當謂瓦頭也瓦文曰
狼千萬延卽琅玕也漢書王子侯表皋琅侯遷地理志
西河郡作皋狼瓦文曰衛屯張平子西京賦衛尉八屯

警夜巡晝五臣注屯營也長水中壘屯騎武賁越騎步兵射聲胡騎言此八屯皆衛尉掌之晝夜巡警瓦文曰樂當大萬或以萬字下半反書例應左行讀作大萬樂當定爲大予樂署瓦馥又見一錢范背有文曰富人大萬萬字亦反書漢書劉向傳功費大萬百餘乃知大萬漢人習語樂讀爲長樂未央之樂故又有單文樂字瓦也

漢器萬字多反書漢印有平字者亦然漢碑年命字多垂長

鎗

說文鎡鎡鎡也集韻鎡釜屬通作鎡南齊書蕭穎胄傳
上慕儉欲壞鑄太官元日上壽銀酒鎡馥案鎡卽鎡鎡
今之鎡也竟陵王子良遺何點嵇叔夜酒杯徐景山酒
鎡以通意

古人有元日上壽酒具東觀漢記今日歲首請上雅
壽注云雅酒間

顏氏石杯

吾邑顏氏有石杯其家相傳石出外國可鍊成金案顏
說乃鋤石鋤石似金可鍊出波斯國鋤石可引水銀惜
未試之

談藪周捨謂沙門法雲曰孔子不飲盜泉之水法師
何以捉鋤石香鑪蓋鋤音如偷

枅

廣韻枅承衡木也案南齊書王敬則傳從市過見屠肉
枅歎曰吳興昔無此枅是我少時在此所作也馥以爲
屠家稱肉用枅以承衡

筆柱

傅元謂漢末人筆豐狐之柱秋兔之翰崔豹古今注古
以枯木爲管鷹毛爲柱羊毛爲被王羲之筆經探豪竟
以麻紙裹柱根次取上豪薄薄布令柱不見然後安之

馥案筆柱卽筆心也筆墨法云作筆當以纖梳梳兔豪毛及羊脊毛羊脊爲心名曰筆柱或曰墨池

生草

莊子讓王篇環堵之室茨以生草新序節士篇原憲居魯環堵之室茨以生蒿案生謂鮮草未乾卽牽蘿補屋之意

腰扇

通鑑褚淵入朝以腰扇障日胡注腰扇佩之於腰今謂之摺疊扇馥案腰扇如腰鼓謂中腰瘦減異於團扇韋昭說屏攝云攝形如嬰扇高注淮南汜論訓云嬰狀如

今要扇

笙簧

先鄭注春官笙師云笙十三簧說文廣雅三禮圖竝同
惟高誘注呂氏春秋五月紀云笙十七簧案郭注爾雅
大者十九簧小者十三簧宋書樂志宮管在左旁十九
簧至十三簧曰笙然則高所云十七在十九十三之間
笙正月之音陽聲也故二七九皆奇數

帶鉤

余見古銅帶鉤數十枚皆作螳螂形卽革帶所施隋書
禮儀志革帶案禮博二寸今博三寸半加金縷鰈螳螂

鉤以相拘

笙席

梁書顧憲之傳連歲疾疫死者大半棺木尤貴悉裹以笙席棄之路旁案左太冲吳都賦桃笙象簟劉涓子注云桃笙桃枝簟也吳人謂簟爲笙

案

玉篇案几屬也食器也馥按四愁詩何以報之青玉案李善曰玉案君所憑倚東宮舊事太子納妃初拜有漆金渡足奏案一枚江表傳孫權拔刀斫前奏案曰諸將復有言迎曹者與此案同東觀漢記更始韓夫人侍飲

見常侍奏事怒起抵破書案廣韻曹公作欹案臥視書
又上雜物疏有純銀鏤帶漆畫書案一枚南史江乘之
爲臨海太守作書案一枚梁簡文帝書案銘性廣和平
文彫非曲廁質錦帳承芳綺縹被召通今按奸治俗刻
香鏤采織銀卷足馥謂此皆言几屬也方言案陳楚宋
魏之間謂之檮自關東西謂之案急就篇檜杆檠案栝
間盃顏注無足曰檠有足曰案所以陳舉食也考工記
玉人之事案十有二寸棗栗十有二列注云棗栗實於
器乃加於案楚漢春秋淮陰侯曰臣去項歸漢漢王賜
臣玉案之食史記高祖過趙趙王張敖自持案進食漢

書萬石君對案不食貢禹傳見賜杯案畫文金銀飾非所以食臣下也東觀漢記尹敏與班彪相談常對案不食又云蔡彤在遼東賜錢百萬下至杯案食物大小重沓鹽鐵論今民間酒食殺旅重疊燔炙滿案又云常民文杯畫案又云垂拱持案食者不知蹠耒躬耕者之勤也燕丹子太子常與荊軻等案而食烈士傳魏公子無忌方食有鳩入其案下古文苑僮約滌杯整案注云案以設飲食之具孟光舉案齊眉吳志步騭傳征羌作食身享大案殺膳重沓以小盤飯與騭惟菜茹而已曹瞞傳及歡悅大笑至以頭沒杯案中肴膳皆沾滂巾幘神

仙傳吳興人沈羲爲仙人所迎上見老君玉女以金案玉杯藥賜羲夢書夢見杯案賓客到也馥謂此皆言食器也

隱囊

今牀榻閒方枕俗呼靠枕卽隱囊也通鑑陳後主倚隱囊置張貴妃於席上注云隱囊者爲囊實以細軟置諸坐側坐倦則側身曲肱以隱之馥案隱讀如孟子隱几之隱昔人用於車中說文紕車紕也急就篇鞞鞞鞋鞞鞍鑣錫顏注鞞韋囊在車中人所凭伏也今謂之隱囊

籠絳

今於足衣外復著短袴謂之攏袴馥謂攏當爲麟說文
麟羽獵韋絺雲南人用韋爲之

契囊

漢書趙充國傳張子孺持囊簪筆事孝武帝張晏云囊
契囊也近臣負囊簪筆從備顧問隋書禮儀志云中世
以來惟八座尙書執笏笏者白筆綴其頭以紫囊裹之
其餘公卿但執手版荷紫者以紫生爲袂囊綴之服外
加於左肩周遷云昔周公負成王制此衣至今以爲朝
服蕭驕子云名契囊

說文曰佩也卽笏字

徐廣車服雜注古者貴賤皆執笏有事則書之常簪筆

晉書輿服志古者貴賤皆執笏其有事則搢之於腰帶間所謂搢紳之士者搢笏而垂紳帶也笏者有事則書之故常簪筆今之白筆是其遺象手板卽古笏矣手板頭復有白筆以紫皮裹之名曰笏

南齊書輿服志其肩上紫袷囊名曰契囊世呼爲紫荷

梁書周捨問劉杳尙書官著紫荷囊相傳云挈囊竟何所出杳答曰張安世傳曰持橐簪筆事孝武皇帝

數十年韋昭張晏注竝云橐囊也近臣簪筆以待顧問

昭文帶

古玉器有昭文帶蓋佩劔之器本名璚說文璚劔鼻玉也漢書王莽傳孔休侯莽莽進其玉具寶劔曰誠見君面有癥美玉可以滅癥欲獻其瑑耳卽解其瑑顏注瑑字本作璚後轉寫者譌也馥審其製參以今之帶刀法蓋大帶與兩劔繫竝母於穿中劔把昂向前故短其繫繞穿之左劔首俯向後故長其繫繞穿之右兩繫分繞使劔不移穿旣受帶亦不移矣周遷輿服雜志漢儀諸

臣帶劔至殿階解劔晉世始代之以木廣韻櫛劔古木
劔也馥謂劔本武備後世以木爲佩飾故有昭文之稱
也

隋書禮儀志案漢自天子至於百官無不佩刀蔡謨
議云大臣優禮皆劔履上殿非侍臣解之蓋防刃也
近代以木未詳所起東齊著令謂之象劔言象於劔
馥案晉書輿服志亦言晉始代之以木新唐書柳冕
傳帝問象劔尺寸通鑑開成元年郭皎奏諸司儀仗
有鋒刃者請皆輸軍器使遇立仗別給儀刀注云儀
刀以木爲之以銀裝之具刀之儀而已馥謂儀刀猶

象劒也

哀十七年左傳不釋劒而食正義云劒是害物之器
不得近至尊故近君則解劒良夫與君食而不釋劒
亦不敬也據此則劒履上殿周世已然

小兒汲瓶

或問俗以金銀或桃核造爲汲瓶縣小兒腕間何所依
據余不能荅及檢左傳急就篇始得其說昭七年傳云
賂以瑤瓊急就云璧碧珠璣玫瑰瓊顏注玫瑰玉名瓊
汲瓶今人以雜寶爲鑪之屬帶於嬰兒頸下此古之舊
事云云是卽汲瓶之所由來也其以桃核蓋祓除之遺

銅池

漢書宣帝紀金芝九莖產於函德殿銅池中如淳曰銅池承雷也案檀弓池視重雷鄭注如屋之有承雷也承雷以木爲之用行水今宮中有承雷云以銅爲之

札樸第四

山陰 李信 校正